

## TIMOTEYON ISTE 2

### *Tauamboen Timoteyo chiaid*

<sup>1</sup> Pabado nebi. Nuquin Papan tantiacpadomboen Esuquidistun: –Ëbi chuibeneta –caidquo nebi. –Ambi chiampicpadomboen aton Mado Esuquidistu tantiaquid unësacsho Nuquin Papan abëdi tabadmendac –quequin Esus chuibenequidquo nebi.

<sup>2</sup> Con mado icbobimboecquid mibi neque. Mibi chuiquin nëid dada uanu, Timoteyo. –Nuquin Papan aton Mado Nuquin Icho Esuquidistubëdtan bëdamboen isquin bëdambo icmepashun –quequin mibi tantiembi.

### *Chieshtoenquo icquin Esus chuiban, quiaid*

<sup>3</sup> Con tsusedpabon nacpadomboen Nuquin Papan pauidi tantiaquin ambi chiapadomboen natiadquo iquebi. Adquid icquin Nuquin Papa mibi chianembi. –Mibi tantiaquid Timoteyo bëdambo iquec, Papa. Adquo icmec mibi bëdamboshë iquec. Adquouidi icmeta, Papa –quequin Nuquin Papa chianembi.

<sup>4</sup> –Ëbi nidnu –quesho tantiash mibi shubiondaid tantiec mibi iste bunquiebi, mado. Ambo nidash mibi isec cuishonquetsiabi.

<sup>5</sup> Naden mibi tantiembi. –Aton chichi Doida caidën ani Eunisebëdtan aid daëdshumba Esus tantiabenuiacpadomboen Timoteyontsen nëbi Esus tantiaquieci –quequin mibi tantiembi.

<sup>6</sup> Adquid icsho mimbi tantiondaid padpiden mibi chuinu. –Min Mayan nëidbëd tabadmequin

cuesambo icmequin Esus chuibame, Papa —quequin mibi mamishquin Nuquin Papa chiondambi. Adoac aton Mayan mibèd tabadmiac. Adoaid icquin dacuèdenquo icquin Esus chuibanta, mado.

<sup>7</sup> ¿Nuquin Papan aton Mayan nuquibèd icmiacta nuqui natia dacuèdpe? Padenquo. Comapenen tantiaquid yec nuquibèd icquin nuqui cuesambo icmec. Adembidi Nuquin Papan Mayanèn tantiamiac nuqui matses bèdamboen tantiec. Adembidi nuqui icsate bunaid namenquo icquin mèmunquidquo icnuc nuqui bèdambo icmec.

<sup>8</sup> —Adoaid nebi —queshun dacuèdenquo icquin Nuquin Icho Esus chuibanta. Adembidi dacuèdenquo icquin: —Pabado tantiaquiemi —cata. —Quènèn nauedtsaid Pabado tantiatapi —quenda. Utsibon cuestiadquo icquin chieshënaqui Nuquin Papan namiacpader chieshtoenquo icquin Esus chuibanuna.

<sup>9</sup> Nuquin Papan: —Bèdamboec tabadquid icmequin con Mado Esus tantiamembi —caido icquin adonona. ¿Nuqui bèdamboecuidi tabadshoda Nuquin Papan nuqui bèdamboen isbempondash? Padenquo. Èndenquimboshë nidaidbèdta matses uabi Nuquin Papan: —Èmbi chiaid niacniaquec icsambo icboedëmbi con Mado Esus tantiaho cuidenquo iquendambi —quequin ambi chuipampicpadomboen nuqui Esus tantiamiac.

<sup>10</sup> Aden ambi chuipampid tantiamiabi icshumbic nèbi Esuquidistu matsesmeshun matses tantiamiac. Adoac: —Abi tantiaquid unësacsho icsaido cuidacno nidmenquo icquin

unëstiapimbo icquid icmequin Nuquin Papa yacno abëdi Esuquidistun tabadmendac —quequin nuqui tantiec.

<sup>11</sup> Aden tantiaquin Esus chuibenequidquo nebi. —Ëbi chuibeneta —Esusën caondaic yec Nuquin Papabëdta Esus tantiamequidquo nebi.

<sup>12</sup> Aden chuibeneshobini chieshënquin quënën nauedondash. Adoqui chieshtotiapimbo icquin Esus tantiambi. —Ëmbi tantiaidquo comapenen tantiaquin nabanquidquo Esus nec. Adquid icquin: “Ëbi tantienquo yanushe,” queshun abi tantiamequin ëbi chieshtomenquo iquendac. Nidaidën choabi icquin Esusën ëbi chieshtoenquo icquid icmendac —quec dacuëdenquo iquebi.

<sup>13</sup> Tantia, mado. Mibi chuinu. Ëmbi abimbo chiondaicquo chuiban: —Nuquin Papan chiaidquo nec —queshun. Esuquidistu tantiaquinc mases tantiaquinc caquin adenuidi chuibanta, mado.

<sup>14</sup> Nuquin Papan Mayan nuquibëd iqueque. Aidën namiac ëmbi chiondacpadomboen Nuquin Papan chiaidquo chuiquin Esus chuibanta, mado.

### *Onesipodo chiaid*

<sup>15</sup> Ëmbi: —Cho —cac choenquo icboed mimbi tantiac, mado. Nidaid utsi Asia caid yacnocquido dadpen adec choenquo iccosh. Edemoquenes caid choenquo iccosh. Adecbidi Piquedo caid chedo.

<sup>16</sup> Onesipodo caidën nëbi bëdamboen isposhi. Ëbi quënën nauedacsho dacuëdenquo icquin isuanisuanquin bëdambo icmioshi. Adsho isun: —Aton

shubun icquidobēdta aid bēdamboen ista, Papa — quequin Nuquin Papa chianembi.

<sup>17</sup> Aidēmbi nēmbo shubu dadpen icquid Doma caid yacno choboshon: —¿Mitsimbo Pabado icpec? —quequin yuen nibēmbenequin istuidpondashi.

<sup>18</sup> Mimbi isnubi Epeso yacnoshon aidēmbidi baded-badedquien nashundeniondashi. Adsho tantiahsun: —Nidaidēn padpidec choshon Nuquin Icbon Onesipodo bēdamboen ispashun —caimbi.

## 2

### *Chieshtoenquo icquin chuiban, quiaid*

<sup>1</sup> Chieshtoenquo icquin Esus chuibanta, mado. —Esuquidistun ēbi bēdamboen isec. Aidēn bēdambo icmiac dayacquio icquin naimbi —qeshun chieshtoenquo icquin Esus chuibanta.

<sup>2</sup> Matses dadpenshun tantianuc ēmbi chuiban-sho mimbi tantiondac. Ēmbi aden chiondaid utsibotsen chuiban. Adshun mimbi chuiboedo abentse-abentsen chuita. —Nēidēn chieshtoenquo icquin Esus chuibantsiash —qeshun: —Mimbitsen chuiban —cata, mado.

<sup>3</sup> Sondado bēdambo icquidēn nacbimboen chieshtoenquo icquin bēdamboen nabanuna. Matsesēn chieshēnubi Esuquidistun chiacpadomboenuidi nanuna chieshtoenquo icquin.

<sup>4</sup> Sondadon: —Mibi bēdambo iquēc —camenuen aton chuiquid dapan chiacpadomboenuidi naquid. Ambi tantiaid nainquo icquinc utsibon chiacpadomboen nainquo icquinc caquin aton chuiquid dapan chiacpadomboenuidi naquidquo sondado nec. Adomboembidi Nuquin Icbon chiacpadomboenuidi nanuna, mado.

<sup>5</sup> Ma nuquin matses titinquequidquio. ¿Mitsipadquio icpec? Aton uidën tanec aton matsesën chiaction abia titinquec chosho: —Bëdamboec titinquiosh —qeshun mauete menequid. Ambi chiaction titinquiyabi icsho mauete menenquio icquid. Adembidi: —Mimbi bëdamboen naoc —Nuquin Icho camenuen ambi chiacpadomboen chieshtoenquio icquin nabanuna, mado.

<sup>6</sup> Ma nuquin matses tied uaquidquio. ¿Mitsipadquio icpec? Chonoadquidënquio dayacquio icquin aton tied uashun ambi nitsinaid pequid. Adembidi Esus chuibanquid icquin dayacquio icquin Esus chuiban-chuibanuna ënenquio icquin. Adoac utsibon Esus tantiabentsiash.

<sup>7</sup> Aden ëmbi chuiboed tantiata. Adsho Nuquin Icbon mibi bëdamboen tantiametsiash.

### *Esuquidistu tantiata, quiaid*

<sup>8</sup> Utsibon chieshënubi Esus tantiata, mado. Aidi matsesash isadaidbo tsusedpa Dabidën tsyuecquid nepanëdash. Nuquin Papan uincumenëdaidquio yec abi iquec. Aidquio tantiaquiota. Aid chuibenequidquio nebi.

<sup>9</sup> Aden chuisho chieshënquin bedshun icsambo icquid uidën uacbimboen shocosh nacnenaidën mëtaniac mëyadebi. ¿Ëbi aden uidën uacbimboenda Nuquin Papan chiaid uidën uapadic? Padenquio. Ëmbi chuibenetiapimbo icnuc Nuquin Papan chiaid chuibanquido utsibon adembidi chuibenendac.

<sup>10</sup> Adnubi: —Aden Nuquin Papan ambi tantiactedi Esuquidistu tantiamendac. Aid tantiaquido unësacsho cuidenquio icquin abëdi

tabadmendac –quec chieshtoenquo iccobi quënën nauedonda yequi.

<sup>11</sup> Naden abimbo chiaidquo tantiash chieshtoenquo iccobi.

—Abi bunaid ënshun Nuquin Icbon chiacpadomboen naquid chieshëmënquidën unës uacsho Nuquin Icbon abi yacno abëdi tabadmendac.

<sup>12</sup> Utsibon chieshënaqui chieshtoenquo icquin Esus tantiec unësash abi yacno nidendac. Nidacsho chuiquid icmiac utsibo namendac.

“Esus tantiatiapimbo iquebi,” quequidobic: “Ëmbi tantiacmaido neque. Nëid nuquibëdi tabadmenquien ictiad, Papa,” quequin Esusën Nuquin Papa chiendac.

<sup>13</sup> Aden abi tantiesabon ambi chiaid niacniacsho isun Nuquin Icho Esusën ambi chiacpadomboen naquidquo icquin icsaido cuidendac.

Adembidi ambi chiacpadomboen abi tantiaquido bëdambo icmendac

—quequin chiaid tantiashun ambi chiacpadomboen naquin Esusën naid chuibanuna chieshtoenquo icquin.

### *Nuquin Papan chiaid isbanta, quiaid*

<sup>14</sup> Ëmbi dada uaquin chuiboed mibëd icquido naden chuibanta, mado. —Nuquin Icbon nuqui isnubi Esusquo chienquo yec ambembi chiaid chiec mibi chushcananquieque. Adenda. Adec chushcanansho tantiash matses icsambo yaneque. Padi —cata, mado.

<sup>15</sup> —Mibi bēdambo iquec —Nuquin Papa camenuen bēdamboen nata. —Dacuēdtiapimbo iquebique. Ēmbi naid ma Nuquin Papan isnu —qeshun adota. Ambi chiaid bēdamboen isbanshun chieshtoenquo icquin Nuquin Papan chiaidquo chuibanta, mado.

<sup>16</sup> Ambembi chiaid chuiquidobēd onquec tabadenda. Adec onquequido icsambo icboedi buēdanquiec Nuquin Papan chiaid niac-niaquec icsamboshē yaneque.

<sup>17</sup> Tosho bedacimboec adquidēn chiaid tantiaquido dadpen yaneque. Adquidēn chuisho tantienda. Aden chuiquid Imeneyo caid nec. Adquidbidi Pideto caid nec.

<sup>18</sup> Aidon Nuquin Papan chiaidquo chienquo icquin muaquin chiec. —Esus tantiaquido unēsabi icquido nēbimbobi uincuenacimboec icpec. Unēsacsho aton dada chuca uaqin uincuemenuo iquendac —quequin muaquin chuisho tantiashun utsibon Nuquin Icbon chiaid tantienquo yanac.

<sup>19</sup> Aidon Esus tantiabien icchitash. Nuquin Papan Esus tantiamiac ēnenquo icquin Esus tantiatsempanēdash. Padnuc Esus tantiaquidombo dadpen iquec. Adquido chuiquin ambi dada uamepampicpadomboen: “Ēbi tantiaquidombo nec,’ quequin Nuquin Icbon tantiec.” Adnuc Esus tantiaquidēn: —Con Icho Esus nec —qeshun ambi icsamboen naid ēnendac.

<sup>20</sup> Esus tantiaquido nadquo iquec. Shubu dapan tsitsan tabēcaid tabadacimboecquid nec. Tsitsan abentse-abentsec icsactsēcquo icnubi utsiutsiec bēdambo iquec. Icsactsēcquidēn icsa seca-

nun sandoquid yendac. Bëdambo icquidën di nandoquid yendac. Adecbidi Nuquin Papan shubun tabadtequido iquec. Utsi-utsiec Nuquin Papan chiaid natiadquio yec Esus tantiaquidquio icnubi utsi-utsiec abi icsaid ënabi: —Esus tantianu —quetsëcquid iquec.

<sup>21</sup> Esus tantiaquidquio ictiadquio yec: —Muaid chuisho tantiatiapimbo icquin nëbi Nuquin Icbon chiacpadomboen natiadquio iquebi —quiash Nuquin Icbon yuambo yantsiash. Adsho Nuquin Icbon bëdamboen nametsiash.

<sup>22</sup> Caniabon mëmunenquio icquin abi bunacpadomboen naquid tanenda, mado. Adenquio yec bëdamboec tabadte bunquiota. Nuquin Papan chiaid niacte bunenquio yec: —Nuquin Icbo Èsus nec —quequidobëdtan chieshtoenquio icquin Esus tantiaata. Matsesten tantiec bëdamboec isnanec bëdamboec tabadta.

<sup>23</sup> Mibi yacnoshon ambembi chuiquidon: —Mimbi icsamboen tantiec —canuen: —¿Mitsipaden mimbi tantiape? —cac chienda. Adquidën chuisho tantiash mases chushcananondashe. Aidën chiac chienda.

<sup>24</sup> Nuquin Papan chiaid chuibanquid chushcananenquio icquid nendac. Chieshëmënenquio icquin aton mases bëdamboen isquid nendac. Adembidi nëishënenquio icquin Nuquin Papan chiaid tantiamequid nendac. Utsibon chieshënaqui chieshënanenquio icquid nendac.

<sup>25</sup> Esus tantiesabon: —Mimbi Nuquin Papan chiaid chuisho tantiatiapimbo iquebi —cac adembi nëishenquio icquin Nuquin Papan chiaidquio chuibanendac. —Nuquin Papan ambi chiaidquio tantiamiac: “Icsamboen naombi,”



quequin ma Esus tantiesan tantiabenu –quequin aden chuibanendac.

<sup>26</sup> –Aden Nuquin Papan ambi chiaidquoio tantiamiac Esus tantienquoio icboedëmbi Esus tantiabenshun abi yuaquidën Satanasën namiaid ënendac. Aden Nuquin Papan chiacpadomboen naindac –qeshun chieshtoenquoio icquin Nuquin Papan chiaidquoio chuibanendac abi chuibanquidën.

### 3

#### *Icsambo icquido iquendac, quiaid*

<sup>1</sup> Tantia, mado. Mibi chuinu. Esus padpidec choabi icnuc matses dadpenquioshë icsamboshë iquendac.

<sup>2</sup> Nadquido iquendac. Nëidic utsi tantiatiapimbo yec abiuidtsëqui datantiadquido. Nëidic piucquid bedte comapenec bunquidombo. Nëidic: –Is. Ëmbimbo naiduidi bëdambo iqueque –quequido. Nëidic utsibo chieshë nec icsamboec onquequido. Nëidic amën chiaid niac-niacquido. Nëidic anin chiaid niac-niacquido. Nëidic aton na nashunaqui nashumënenquoio icquido. Nëidic Nuquin Papan chiaid niac-niacquidombo.

<sup>3</sup> Nëidic aton matses tantiesabo. Nëidic chiesh bëdanesabo. Nëidic muauanquido. Nëidic abi ic-sate bunaid ënenquoio icquido. Nëidic cuesanquido. Nëidic bëdambo icquid chieshë nquido.

<sup>4</sup> Nëidic bëdambo icquid damianquiashic cuesunianquido. Nëidic bëdamboen tantienquoio yec badedi icsa uanquido. Nëidic: –Ëbiuidtsëqui bëdambo iquec –quec abibi tantiadquido. Nëidic ambi naiduidi bunquin Nuquin Papa tantiesabo.

<sup>5</sup> Nēidic: —Nuquin Papa tantiaquid nebi — quec muaquin aidēn chiaid niac-niacquido. Adquidtedi icsambo icquido nec. —Adquidbēduidi onquec tabadenda —caimbi.

<sup>6</sup> Adquidon mibi yacnoshon shubu utsin shubu utsinquien isben-isbenac caosh. Adash chidouidquio icnubi shubun puduedshun ambembi chiaid chuibanac caosh. Aden chuisho tantiaquid: —Padi —catiadquidi chidon: —Mimbi chiaid tantianu —quequin badedquio tantiac caosh. Nuquin Papan chiaid niacash adecbidi icsate bunquieq tabadac caosh aid chidobo.

<sup>7</sup> Aden icsambo icquidēn ambembi chuide- nesho tantianeshun Nuquin Papan chiaidquio tantiatipimbo icpac caosh aid chidobo.

<sup>8-9</sup> Aid chidobo chiec muaquido icsambo icpampidobimboec iquec. Icsambo icpampid abentsēc Canes cuēmēdnubi utsi Mambades cuēmēdpampic. Isadaidbo tsusedpa Moisesēn Nuquin Papan chiaidquio chuisho tantiaquid: —Mue nec. Ēmbimbo comapenen tantiaquin ismenu —queboedombi bēdiactsēc tantiaquin nacenuidpampic. Adsho isun: — Abimbo cainquio iccosh. Muachitosh —capampic matsesēn. Adembidi chido chiec muaquidon icsate bunquin ambi chiaid chuitiapimbo icsho Nuquin Papan bēdamboen istiapimbo iquec. Adembidi aidon muaquin chuisho tantiaquid matses dadpeshun: —Muequi nec —capendac.

*Nuquin Papan chiaid isbanec bēdamboec tabadte*

<sup>10</sup> Ēbien muaquidpenquio nec. Ēmbi naid ma mimbi tantieyoc. —Ma Ēsus tantianu —quequin

Esusën naid chuibanec bēdamboec tabadondabi. Esus tantiaquidquo icquin matses tantiaquin Esusën naid chuibeniondambi. Chieshēnaqui chieshtoengquo icquin adembi chuibeniondambi.

<sup>11</sup> Ēmbi aden chuibansho isun chieshēnondashi. Shubu dadpen icquid Antioquiya caid yacnoshon ēbi: —Cuesnu —casha Nuquin Icbon nac padengquo icpondash. Adshumbic shubu dadpen icquid utsi Iconio caid yacnoshontsen adembidi. Adshobini shubu dadpen icquid utsi Disteda caid yacnoshonquo bedshun cuēnoten se-sequin unēs uatsempondash. Adsho Nuquin Icbon nac unēsenquo iccondabi.

<sup>12</sup> Ēbipadquido Esus tantiaquidotedi bēdamboec tabadtiadquo icsho adembidi utsibon comapenen chieshēnendac.

<sup>13</sup> Padnuen chieshēmēnquidobēd bēdambo icquid damianquiec muaquido bēdiactsēc icsambo icboedi muauananquiec buēdanquiec icsamboshē yanendac.

<sup>14</sup> Mibi adquidpenquo nec, mado. —Ēmbi isondaidon bēdambo icquidon abimbo chuibanondashi —quec Nuquin Papan chiaid niaquenquo yec bēdamboec tabadta, mado.

<sup>15</sup> Ēnden bacuēmpi icquin Nuquin Papan chiaidquo min matsesën chuibansho mimbi tantianēdac. Adshun: —Aton Mado Esus tantiaquid unēsacsho abēdi Nuquin Papan tabadmendac —quequin mimbi tantiabenēdac. Aden Nuquin Papan bēdamboen iste tantiametembo Nuquin Papan chiaid nendac.

<sup>16</sup> Nuquin Papan chiaid aton Mayanēn tantiamiac matsesën dada uapampic. Aidēn

chiaid abitedimbo bēdamboeshē iquec. Aid isec onquequin: —Nuquin Papan chiacpadec bēdamboec tabadnuna. Esus tantiaquido yec icsainquien ictiad —quequin abi chuibanquidēn chuibanec. Adembidi: —Esus tantiaquido adesa. Padi. Bēdamboembien natiad —quequin chuibanec.

<sup>17</sup> Nuquin Papan: —Ēmbi chiaidquio tantiashun Esus tantiaquinc matses nashunquinc caic Esus tantiaquido ma bēdamboec tabadnu —quequin ambi chiaidquio dada uamepampic.

## 4

### *Nuquin Papan chiaid chuisho tantienquio yaid*

<sup>1</sup> Nuquin Papabēdtan Esuquidistun mibi iseqe. Bēdamboen nata. Esusēn nidaidēn padpīdec choshon abitedishun Icbombo icquin unēsaido uincuemiaido unēsabi icquidobēdta chiendac. — Nēid ēbi tantiaquid ēbēdi tabadmembī. Nēid ēbi tantiesa cuidembī —quequin chiendac.

<sup>2</sup> Aidēn chiacpadomboen naquin Nuquin Papan chiaidquio chuibanta, mado. Matsesēn tantiatiadquio icnuc adota. Tantiatiapimbo icnubi adembī chuibanta. Esus tantiaquido icsasho isun: —Esus tantiaquido adesambo neque. Bēdamboembien natiad —quequin nēishēmēnenquio icquin chuita, mado. Utsibo bēdamboec tabadsho: —Mibi bēdamboec tabadoc. Aduidequi tabadta —quequin chieshtoenquio icquin chuita. Bēdiactsēc tantiatsēcquido: —Esus tantiaquidon nadoquid —quequin chuibanta, mado.

<sup>3</sup> —Yuecshun Nuquin Papan chiaidquio matses dadpenshun tantiatiapimbo iquendac —qeshun

nata, mado. Aden tantiatiapimbo icquidën Nuquin Papan chiaidpenquo chuisho tantiash: — Mimbi ëbi bunaidquo chuisho tantianu. Ëbi chiec cho —quequin muaquid utsi-utsien abi yacno puduedmendac.

<sup>4</sup> Pamumëdabimboecquin Nuquin Papan chiaid tantienquo icquin tsusedpabon ambembi chi-ampiduidi tantiendac.

<sup>5</sup> Aidën nacpadomboen nainda, mado. Nuquin Papan chiaidquo bëdamboen tantiaquid yec bëdamboec tabadta. Adsho utsibon chieshënaqui chieshtoenquo icquin Esusquo tantiata, mado. Adembidi Nuquin Papan bëdamboen iste Esus tantiesabo chuibanta. —Esus chuibanquidën nadoquid —caidtedi nabanta, mado.

<sup>6</sup> —Ëbi unës uan ëmbi nacpadomboen: “Adota,” mibi caquid nibëdtsiash —queshun mibi aden chiec nebi. Nëbi Nuquin Papan tantiacpadën chieshëmënquidon ëbi unës uaic.

<sup>7</sup> Utsibon chieshënubi ënenquo icquin Esusën naid chuibeniombi. —Ëbi bunaid bednu —quec comapenec titinquiabimboen dayacquio icquin Nuquin Papan chiaidtedi naombi. Chieshtoenquo icquin Esus tantiaquidquo nebi. Adshobini nëbi unës uaic.

<sup>8</sup> Unës uacshobini matsesën naid abitedimbo tantiaquidën Nuquin Icbon: —Ëbi tantiaquin ëmbi chiacpadomboenuidi naic mibi bëdambo iccoque. Nuquin Papa yacno ëbëdi tabadmequin mibi bëdamboshë icmendambi —caindac. Abi chote ushën choshon aden Nuquin Icbon ëbi chiendac. Adembidi abi chosho iste bunquidotedi abi tanti-aquido Nuquin Icbon abëdi tabadmendac.

*Timoteyo: Cho, caid*

<sup>9</sup> Nëbimbobi ëbi isec cho, mado.

<sup>10</sup> Utsibo nidanebon ëbentsëqui tsadebique. Demas caid aton na bedteuidi bunec ëbi nianec shubu dadpen icquid Tesadonica caid yacno nidosh. Quedesente caidic nidaid utsi Cadasia caid yacno nidosh. Titobic nidaid utsi Damasia caid yacno nidosh. Aidtedi nidanebon

<sup>11</sup> Ducas abentsëqui ëbëd iquec. Madcos bedbëtsenec cho, mado. Ëbëdtan aidëmbi nëshunquo Esus chuibantsiashe.

<sup>12</sup> Tiquico caid Epeso yacno mibi yacno nid-miombi.

<sup>13</sup> Shubu dadpen icquid Todoas caid yacno Cadpo cuëmëdquidën shubun con na niamëdaccondashe. Con dashcute ëmbi dada uaidbëdta bedbëtsenec cho, mado. —Abitedi buantiapimbo iquebi —qeshun nëish yua bitsi nacnenaid dada uaiduidtsëqui bëta.

<sup>14</sup> Shocosh nacnenquidën Adecandedo caidën comapenen chieshëndashi. Aid Nuquin Papan cuidendac, mado.

<sup>15</sup> Nuquin Papan chiaid ëmbi chuisho tantiatiapimbo icquin icsamboen chuishunon-dashibique. Choquin aid isenda: —Ëbitsen icsamboen chuishunushe —qeshun.

<sup>16</sup> Ënden tauamboen bedshun: —Quënën nauednu —cac cuidte chuiquid dapa ëmbentsëqui chuibampondambi. —¿Mitsipadosho isun ëbi bedo? Icsamboen nambo iccombi —capondambi. —Ëbëd icboedon dadpenshun: “Bëdambo icquid nec,” quequin ëmbi naid chuibanac ëbi quënën nauedquidon ëbi nidmetsiash —qeshun

ëbëd icboedo: –Chiec cho –caqui choenquo iccondash. Aden ëbi cacuidondaïdo tantiaquin: –Nuquin Papan aïdo cuidenquo icpashun –caimbi.

<sup>17</sup> Nuquin Icbombini nianenquo iccondash. –Isadaïdpembo matses utsibo ma ëmbi naïd chuibenenu –quequin cuesambo icmepondashi. Adondaïd icshobini chieshëmënquïdon: –Cuesnu –cabededpondash. Nuquin Icbon nac aïd matsesën unës uainquo icpondashi.

<sup>18</sup> Padpïden chieshëmënquïdon ëbi caïc: –Ma mëyanac chieshtoshon Esus tantienquo yanu –casho Nuquin Icbon nac chieshtoenquo ictsiabi. –Nuquin Icbombidi abi yacno ambi matses dadpen namiacno abëdi ëbi tabadmendac –qeshun: –“Nuquin Icbo bëdamboshë iquec,” canuna ënenquo icquin –caimbi.

<sup>19</sup> Mibi yacnocquïdo: –Mibi caïc: “Unësquo iquec,” quïosh Pabado –quequin chuïban, mado. Nëïdic Aquïda caïd. Nëïdic aton chïdo Pïdisïda caïd. Nëïdic Onesïpodo caïd chedo. Aïdtedï aden chuïban.

<sup>20</sup> Mïmbï isondaïd Edasto caïd shubu dadpen icquïd Codïnto yacno tëshëdondash ëbi chonoc. Ut-sïbic Tëdopïmo caïd aton dada icsabudacsho shubu dadpen icquïd Mïdeto caïd yacno nïanondambi.

<sup>21</sup> Ue tsasi iquenuanquïd taënushe. Baded cho, mado. Doma yacnocquïdo nëmbo icquïdon: –“Timoteyo unësquo iquec,” quequin dada ua –caposhi. Nëïdic Eyobudo caïd. Nëïdic Pudente caïd. Nëïdic Dïno caïd. Nëïdic Quëdaudia caïd. Nëïdic Esus tantiaquïdo nëmbo icquïdo utsïbotedi. Aïdtedï adosh.

22 —Nuquin Icho Esusën abëd icquin con mado  
bëdamboen ispashun —quequin mibi tantiemi.  
Padi. Aidedi chuiquin dada uaombi, mado.



## **Esuquidistu Chuiquin Tantiamete New Testament in Matsés (PE:mcf:Matsés)**

copyright © 2008 Wycliffe Bible Translators, Inc.

Language: Matsés

Translation by: Wycliffe Bible Translators, Inc.

Matsés [mcf], Peru

### **Copyright Information**

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Matsés

**© 2008, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files  
dated 29 Jan 2022

446da786-5bd1-5ffa-85e2-9eff4052cf8b